

Lelaki bawa 800 liter diesel tanpa permit ditahan di Bintulu

2020-05-18T12:12:13+08:00

oleh Ambrose Rirang



Kenderaan membawa 800 liter diesel tanpa permit sah yang ditahan PPMW 5 dalam OP COVID-19 pada Sabtu lalu.

BINTULU: Pasukan Polis Marin (PPM) Wilayah 5 Bintulu merampas empat tong dram berisi minyak diesel tanpa dokumen sah yang dibawa oleh sebuah kenderaan pacuan empat roda di Kilometer 10, Jalan Tun Hussein Onn di sini pada Sabtu lepas.

Menurut Komander PPM Wilayah 5, Asisten Komisioner Shamsol Kassim, dalam OP COVID-19 yang dijalankan oleh Unit Risikan Marin PPM itu, pihaknya menahan pemandu, 40, ketika melalui jalan berkenaan, sekitar 12 tengah hari.

"Pemeriksaan yang dijalankan menjumpai empat tong dram berisi minyak diesel sebanyak 800 liter yang dianggarkan bernilai RM1,160 yang diletakkan pada bahagian belakang kenderaan itu," ujarnya dalam satu kenyataan, hari ini.

Katanya, hasil siasatan mendapati suspek tidak mempunyai sebarang dokumen kebenaran dari Kementerian Perdagangan Dalam Negeri dan Hal Ehwal Pengguna (KPDNHEP) bagi menyimpan barang kawalan tanpa permit.

Kenderaan digunakan suspek ujarnya turut disita di bawah Akta Kawalan Bekalan 1961 kerana memiliki barangan kawalan berjadual tanpa kebenaran.

"Laporan polis sudah dibuat berhubung tangkapan ini bagi membolehkan tindakan lanjut dijalankan terhadap suspek serta barangan yang dirampas," jelasnya.

Kesemua bahan rampasan serta kenderaan terbabit yang dianggarkan bernilai RM90,000 turut disita sebagai bahan kes dan diserahkan kepada KPDNHEP Bintulu untuk siasatan lanjut.

<https://www.utusanborneo.com.my/2020/05/18/lelaki-bawa-800-liter-diesel-tanpa-permit-ditahan-di-bintulu>

